

Poštovani predstavnici Savskih zemalja,

Poštovani predstavnici međunarodnih institucija

Dragi gosti

Dame i gospodo

Čast mi je i zadovoljstvo pozdraviti Vas u ime institucija iz Bosne i Hercegovine na ovom 7. sastanku stranaka Okvirnog sporazuma o slivu rijeke Save.

Uvijek je zadovoljstvo biti među prijateljima i imati tu privilegiju i priliku da svojim angažmanom doprinesemo jačanju regionalne saradnje, a u cilju unaprijeđenja ekonomske aktivnosti i kvaliteta života svih stanovnika koji dijele sliv rijeke Save.

Kao rezultat dobre saradnje aktivnosti Međunarodne komisije za sliv rijeke Save su prepoznate i prihvaćene u zemljama ali i na globalnom nivou. Vrlo često se u različitim formatima međunarodne saradnje naše zajedničke aktivnosti ocjenjuju kao primjer dobre prakse, a svi oni koji pokušavaju da nađu rješenja za unaprijeđenje prekogranične saradnje pokušavaju se ugledati na naša dostignuća.

Imajući ovo na umu, iskoristio bih priliku da se zahvalim i da čestitam na uspješnim rezultatima rada svim predstavnicima zemalja u Savskoj komisiji i ekspertskim grupama, Sekretarijatu Savske komisije, ali i svim drugim partnerskim institucijama sa kojima smo sarađivali na različitim projektima i aktivnostima, a kao što su: Evropska komisija, Vlada Sjedinjenih Američkih Država, UN Ekonomska komisija za Evropu, Svjetska banka, Investicioni okvir za Zapadni Balkan i sl.).

Od prethodnog sastanka Strana do danas je po našoj ocjeni učinjen veoma značajan napredak kako u zemljama tako i u okviru Savske komisije. Ovom prilikom bi želio da se osvrnem na nekoliko aktivnosti koje smatramo veoma značajnim.

Prije svega smatramo vrlo važnim stupanje na snagu Protokola o sprečavanju zagađenja vode uzrokovanog plovidbom i Protokola o upravljanju nanosom, a nadamo se da će u narednom periodu kako je to i planirano biti završeni pregovori teksta Protokola o iznenadnim situacijama, te da ćemo finalizirati i inicijativu za izmjenama Okvirnog sporazuma i Protokola o zaštiti od poplava, radi postizanja većeg stepena operativnosti.

Koristim priliku da vas informišem da su nadležne institucije u BiH po prvi put donijele Planove upravljanja vodnim područjima i isti su konzistentni sa zajedničkim Planom upravljanja slivom rijeke Save. Ova činjenica je svakako važna za zajedničke aktivnosti u okviru drugog planskog ciklusa.

BiH podržava aktivnosti na efikasnom radu SavaGIS i SavaHIS platforme, te uspostavi sistema za zajedničko prognoziranje poplava i rano upozoravanje. Za BiH ovo su vrlo važne aktivnosti kroz koje smo unaprijedili kapacitete institucija, a razvijeni sistem za nas predstavlja dodatnu vrijednost. Razumjevajući potrebu za osiguranjem dugoročne održivosti sistema institucije u BiH će učiniti maksimalan napor da se potrebni preduslovi za dugoročnu održivost obezbijede.

Aktivnosti na izradi zajedničkog Plana upravljanja rizikom od poplava za sliv rijeke Save su veoma značajne za nas, imajući u vidu da se implementacija mjera za zaštitu od voda mora posmatrati kroz regionalnu prizmu. U BiH trenutno provodimo aktivnosti na izradi mapa opasnosti i mapa rizika od poplava, a sredinom naredne godine ćemo i formalno pokrenuti aktivnosti na izradi Planova upravljanja rizikom od poplava. Osim navedenih trenutno provodimo niz aktivnosti koje se finansiraju iz različitih izvora na rekonstrukciji i izgradnji objekata za zaštitu od voda u BiH.

U oblasti vodnog transporta je potrebno istaći važnost zajedničkih aktivnosti na obilježavanju i održavanju plovnog puta, a posebno je značajno pitanje obnove i rekonstrukcije plovnog puta rijekom Savom.

Na kraju bih istakao posebnu važnost razvojnog potencijala naše zajedničke saradnje. S tim u vezi ocjenjujemo veoma pozitivnim usaglašavanje i usvajanje Zajedničkog plana aktivnosti u slivu rijeke Save, kojim je identifikovano pet ključnih aktivnosti za koje smatramo da mogu pomoći ubrzanju ekonomske aktivnosti u regionu i postizanju većeg stepena ekonomske integracije između zemalja. Iskreno se nadam da će ove aktivnosti biti prepoznate i podržane od strane međunarodnih finansijskih institucija.

U toku ovog sastanka Strana ćemo sagledati sva najvažnija pitanja naše zajedničke saradnje te se nadam da ćemo usvojiti tekst Deklaracije kojom će se dati jasan pravac za naše institucije i imenovane predstavnike za dalje aktivnosti.

Konačno, iskoristio bih priliku da se svim partnerskim međunarodnim institucijama još jednom zahvalim na dosadašnjoj saradnji i da ih pozovem da istu nastavimo u zajedničkom interesu, a svima bi želio da sa svoje strane čestitam naš zajednički jubilej, a to je Dan Save kojeg obilježavamo 01. juna.

Hvala na pažnji!